



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3 Yangia anidakangma : Tir Yimym tir_yimym

tir yimym TAPAK 8

Centre sorkari tribal nisungtem atema nendaka inyaker: Murmu

Paulo Fonseca Olympique Lyon head coach kumogo

VOL. XXII ISSUE NO. 108 (ADOK 108) DIMAPUR KÜPTOKNÜ (SATURDAY) TSÜKLAI (FEBRUARY) 01, 2025 ₹ 5.00

Aseni takok ngutettsüsa nükjidong ayutsüla: Advisor Temjenmenba

Dimapur, Aenjeti/January 31 (TYO): Jangpetkong Senso Mungdang (JSM) 75 buba Inti mungdang Molungyimsen yimda ananü mung January 31, 2025 nü tembangogo, kong Advisor, Transport and Technical Education, Government of Nagaland, Temjenmenba tetushi tesemdang liasü.

Advisor Temjenmenba-i iba sentong nung jembidang, Naga nunggeri puti otsü nung Khristan yimsü tsütsü Molungyimsen ya tongtipang yimtsüng ka lir, kechiaser iba yimtsüng ajanga asen nübur dangi iba yimsü prokshia ao, ta ashi.

Anungji asen otsüla-oboula nunggeri mapa tajung inyaka yutsüba asenoki maneni inyaksüla, ta pai ayongzük.

Iba ama sentong alidang asenoki takok ngutettsüsa nükjidong ayutsüla aser nübur ajangzüksü asoshi inyaksü pangjemsüla, ta pai ashi.

Mokokchung district nung

kidanger tsükong ana den külemi Jangpetkong tsükong nung rongsenketzüng aintsü nükla tajung lir, aser research agiba nung Nagaland nung crude oil 600 million metric tonnes shi aliba asadangteta lir aser itemji timba tsükong asem nungya lir, ta Advisor Temjenmenba-i ashi.

Iba rongsen agitettsü asoshi asenok lungjemer inyaksüla aser tejakleni renloka aoba den lirumedema aintsü atema putu menden ajanga yimya balala amshitsüla, ta pai ashi.

Convenor, Global Naga Forum aser Naga Hoho indang taoba tir Chuba Ozukum-i iba sentong nung tayongzükba o jembidang, loktiliba aser rongsenketzüng tsütsü tebilemstitem lemsatapa liasü.

Iba sentong JSM mendenpuri anir agi, kong Dibua Village Council ajanga sobaliba ken ka aten aser sentong tenzüka Rev. Tajung Pastor, Molungyimsen Baptist Church ajanga sarasadema liasü.

Lokti tentet tasen ajanga Naga nungger memangmangtsüla: WC, NNPGs

Dimapur, Aenjeti/January 31 (TYO): Working Committee, NNPGs ajungben senden ka January 31, 2025 nü mena pei agitsü kisüng bilemba telok kari nüburtem mangmangdaksütsü meranga Working Committee, NNPGs tasen tenzüka dak sendakba nung sangdong ka Working Committee, Naga National Political Groups ajanga agütsüogo.

December 13, 2016 nü Nagaland Tribes Council (NTC) aser Nagaland GB Federation dener senden ka amenba nung Working Committee, NNPGs ya kumtet. Yimtenren tsütsü Naga nunggeri jangraba ama tangatetep kati arutsü atema sentong asameyanga inyaksü asoshi Naga revolutionary groups trok lungjemer Naga National Political Groups ya kumtet aser ajaki mulunga N. Kitovi Zhimomi, Ato Kilonser, GPRN/NSCN ya WC, NNPGs indang Convenor shima liasü, ta N. Kitovi Zhimomi,

Convener, WC; Kiumukam, Co-Convener, WC; Toshi Walling, Co-Convener, WC aser Shitoho Chophy, Co-Convener, WC nunggeri temi sangdong nung ashi. Tsüngrem temoatsü nung Working Committee mapa nung takok ngua November 17, 2017 nü Agreed Position zülutepa liasü, aser iba ya ajanga dang mapang talangka nungi mangatetepi aliba Indo Naga yimten bentetba nung tejakleni anitsü aser October 31, 2019 nung jembishinü tembangogo aser yamaji sangdongogo aser GOI aser Naga nunggeri tsüngta tatembangba zülutepa atar, ta parnoki sangdong ajanga ashi.

Neokpao Konyak-i aniba aser Agreed Position nung meyongnem agütsür rongnung madenba züngsem kari kumtetba New Working Committee ajanga GOI matsüngdang olong tasen kar benoka jembishinütsü bilema lira, Agreed Position nung meyongnem agütsüba Working

Committee-i menokdangger. Ajisüaka Agreed Position nung meyongnem agütsür atemabo NNPGs ajak shidak lir aser Convenor N. Kitovi Zhimomi lenisüba kübok Agreed Position wazüka amshitsü tangatetba nung tang tashi lir. N. Kitovi Zhimomi ya WC, NNPGs indang Convenor liasü, lir aser lokti ana tsüngta tatembang buba mezülutep tashi Convenor alitsü, ta sangdong ajanga ashi.

Arütsü alema oa aliba Naga nunggeri ajanga lungjemdaksütsü asoshi NNPGs-i bendanga agütsür inyaker aser renema lir. Anungji Naga nunggeri ajanga dang Naga political solution tatem kati arutsü asoshi arok sapang ka mesemtsü mapang tongogo aser pei kisüng agitsü bilemba nisung kar nem memangmangdaksütsüla. Working Committee-i shinga nema iba Agreed Position mejimenen mesüdaksütsü, ta WC, NNPGs sangdong ajangasa ashi.

Committee-i menokdangger.

Ajisüaka Agreed Position nung meyongnem agütsür atemabo NNPGs ajak shidak lir aser Convenor N. Kitovi Zhimomi lenisüba kübok Agreed Position wazüka amshitsü tangatetba nung tang tashi lir. N. Kitovi Zhimomi ya WC, NNPGs indang Convenor liasü, lir aser lokti ana tsüngta tatembang buba mezülutep tashi Convenor alitsü, ta sangdong ajanga ashi.

Arütsü alema oa aliba Naga nunggeri ajanga lungjemdaksütsü asoshi NNPGs-i bendanga agütsür inyaker aser renema lir. Anungji Naga nunggeri ajanga dang Naga political solution tatem kati arutsü asoshi arok sapang ka mesemtsü mapang tongogo aser pei kisüng agitsü bilemba nisung kar nem memangmangdaksütsüla. Working Committee-i shinga nema iba Agreed Position mejimenen mesüdaksütsü, ta WC, NNPGs sangdong ajangasa ashi.

DGC nung anogo ka National Seminar agi

Dimapur, Aenjeti/January 31 (TYO): Research and Development Cell, Dimapur Government College ajanga January 31, 2025 nü Seminar Hall, Dimapur Government College nung 'Sustainable Rural Development, Climate Change and Food Security' omen nung ajemdaker One-Day National Seminar (Hybrid mode) ayongzükba liasü, koba National Bank for Agriculture and Rural Development (NABARD) ajanga sponsor asü aser IQAC, Dimapur Government College ajanga yaritepa liasü.

Iba seminar tenzüka sentong nung Dr Yelhi Vero, Convenor, RDC & Asst. Professor, Dept. of Economics DGC menden liasü aser Prof Sanjay Sharma, Principal, DGC ajanga pela agizükba o jembia.

Sarat Kumar Behera, AGM, NABARD Dimapur ajanga tayongzükba o jembidang India kübok state 28 nung NABARD inyaksangshiba indang tongmelang agi rasaa ashi aser Nagaland nunga NABARD indang inyakyim indang lemsatapedang Nagaland nung NABARD branch district asem nung lir aser tanüngba district tem NABARD, Dimapur branch ajanga awajemer ta metetdaksü.

Iba sülen Dr Bonti Gogoi, Agronomy Specialist, KVK Nagaon, Assam ajanga 'Conservation of Agriculture for

Rural Development and Climate Change in NER of India' onük nung ajemdaker jembia liasü.

Mezüngbuba technical session nung Dr Herali Achumi, Asst. Professor, Dept. of Sociology, DGC menden liasü aser shisalen sayur Dr Rudra Narayan Bokakati, Scientist (Entomology) AICRP on Rapeseed and Mustard, AAU-Zonal Research Station, Shillongani, Assam Agricultural University, Nagaon ajanga 'Eco Friendly Approaches to Sustainable and Greener Future' onük nung ajemdaker online ajanga jembia.

Ano kasa mapang offline session ka Dr A. Sentiya, Assoc. Prof. & Head, Dept. of English, DGC menden sür agia liasü, kong DGC nung department balala nungi research interns 14 den parnok indang Supervisors temi papers lemsatapa liasü.

Tanabuba technical session nung Sedevino, Assoc. Prof. & Head, Dept. of Political Science, DGC menden liasü aser shisalen sayur Dr N. Khumdemo Ezung, Chief Technical Officer, KVK, Wokha ajanga 'Organic Farming for Sustainable Agricultural Development and Food Security' onük nung ajemdaker jembia.

Iba seminar offline nung DGC tesayurtem, kaketshir aser research scholars 102 aser online nungi nisung 9 dena liasü.

TAC züngsemtemi Mokokchung BSNL asendenshitsü ayongzük



Telecom Advisory Committee züngsemtemi Mokokchung BSNL office semdangba mapang yangji inyakerkem den tangokba noksa nung angur. Mokokchung, 31st January, 2025.

Mokokchung, Aenjeti/January 31 (TYO): Telecom Advisory Committee (TAC) züngsem par pezüi January 31, 2025 nü Mokokchung BSNL office semdang yangji inyakerkem den mensem ka mena BSNL dak sentakba tebilemstü onük balala jembitepa liasü.

Iba senden nung TAC züngsem Sashimeren-i jembidang, mapang kabo BSNL yagi India lima rangben nung service tajungtiba agüja aruogo, saka tanü private company balala adokba ajanga BSNL langtsüngi aluba mapang ka lir, anungji tanga private company-tem den sakuku toktepa service tajungtiba agütsütsü merangtsüla, ta ajungshia liasü.

Mokokchung division nung BSNL service junga

magütsütetba tebilemstü kechisa lir, itemji bendena akokba tashi azüklen alirtem den jembitepa inyaksü merangtsü, aji oda, BSNL staff-temia tang dang nungi temulung tagütsüba inyaksü pai ajungshi.

Iba senden nung TAC züngsem K. Imti, Chubasunep aser Alemzüngba parnokia shilem agia jembia.

BSNL Mokokchung nung SDE (Internal), S. Phuveto Swu-ia taoba mapang TAC züngsem aliba angashiaka shingaia iba ama Mokokchung office semdang mali, anungji TAC züngsemtemi mapang agütsüba den khuret bena iba amai semdangba asoshi pelaba metetdaksü.

Paisa Mokokchung division nung mapa balala inyaksangshiba

den tsükdakradang ajuruba aser nungdak balala lemsatap. Iba den yangji field staff-temia parnoki ajangashiba den teinyaksü wadang balala lemsatapa liasü.

Mokokchung office yagi district 6 - Mokokchung, Zunheboto, Longleng, Tuensang, Shamator aser Noklak repranger. Tang ya Kohima nungi AGM kati dang Mokokchung repa repranger, saka Mokokchung division-i district 6 repranger asünung, Mokokchung atema AGM temeja ka nungdakba indang lemsatap. Iba den ano Mokokchung nung BSNL network majungba kulitem aser tajungba renloksü, nungdakba tesem nung tower-tem amenoktsü aser danga onük balala nung shisa lemsatap.

Kohima nung IILB indang awareness sentong agi

Dimapur, Aenjeti/January 31 (TYO): Directorate of Industries & Commerce ajanga January 29, 2025 nü Directorate indang Conference Hall nung Department on India Industrial Land Bank (IILB) ketdangsür atema anogo ka workshop agia liasü.

Department for Promotion of Industry & Internal Trade (DPIIT) ajanga yangerba India Industrial Land Bank (IILB) ya GIS amshitetba centralized platform ka lir, kong India tesem ajunga nung industrial areas aser clusters indang 'comprehensive repository of information' ka ama lir.

Iba nükjidong ya linük tesem balala nung industrial development tiptema aser benteta inyaksü, tali ochishitsü, 'ease of doing business' adokdaksütsü aser investment opportunities sayua ajaklen industry indaksüba nung yaritsü asoshi lir.

Director, Industries & Commerce, P. Tokugha Sema-i iba sentong tenzüka

jembidang, India Industrial Land Bank (IILB) takok ya policy tem shidak mapa kuma inyakba dak keta lir, ta ashi.

Industrial development asoshi tensa tajung kumdaksütsü Department-i merangba nung IILB ya tongtipang lir, ta pai ashi aser ketdangsür dang saksalema inyaksü ayongzük.

Iba IILB inyakyim nung GIS & Remote Sensing Centre ajanga technical teyari agütsüba atema Sema-i ketdangsür nem tenüngsang agütsü.

Deputy Director, Mhonbeni K Nsarangbe ajanga iba sentong ayongzükba nükjidong lemsatepdang portal nung upload asütsü atema state nung land bank data shidak maliba indang ashi.

Lai iba sentong nung dena alir ajunga dang IILB inyakyim nung shilem agitsü ayongzük aser state nung industrial development atema data peria nüngdakba indang nenshia ashi.

Sentong nung General Manager, Chozoba,

Heinangwang ajanga India Industrial Land Bank (IILB) inyakyim aser Land Bank sentong nung shilem ka ama inyakba indang lemsatepa liasü.

GIS & Remote Sensing Centre nungi Data Manager, Sanen Jamir-i GIS Mapping indang presentation tongmelang agi agüja liasü.

Paisa district ketdangsür nem GPS machine tem lema agütsüba department mezüngbubaji Department of Industries & Commerce ya alitsü südi ta ashi.

Surveyor Assistant, Moatemsu-i GPS machine amshiba indang PowerPoint agütsü aser iba sülen land surveys nung GPS machine amshiba yimya tem sayua liasü.

Director ajangasa District Industries Centres indang General Manager ajunga nung GPS machines tem lema agütsü aser Joint Director. K. Hekavi Francis ajanga melepzüng o jembir sentong tembang.

CMG Chairman-i ECHS Polyclinic sendang

Dimapur, Aenjeti/January 31 (TYO): Sepai tejentem temang anema alitsü asoshi yariba temaitsü Lieutenant General Amarjeet Singh Bedi, PVSM, UYSM, YSM, VSM (Retired), Chairman, Ceasefire Monitoring Group (CMG), Ministry of Home Affairs ajanga January 31, 2025 nü Ex-Serviceman Contributory Health Scheme (ECHS),

Polyclinic, Kohima sendanga liasü.

Iba mapang pai medical facilities sendanga staff tem den sensaksema liasü.

Leniri iba tesem sendangba ajanga linük tenzüka alir atema healthcare tajungba kumdaksütsü asoshi inyakba sayur aser service temera temang anema alitsü tongtipang ta sayur.

ADC Kohima-i Indian Army Agniveer CEE atema metetdaksü

Dimapur, Aenjeti/January 31 (TYO): Army Recruiting Office, Rangapahar ajanga shiti ka nung Indian Army-i Agnipath Scheme kübok Common Entrance Exam (CEE) atema online registration lapokba metetdaksü, ta Additional Deputy Commissioner, Kohima ajanga sangdong ka nung ashi.

Iba recruitment ya Nagaland nungi kibong mekumi aliba teburtem asoshi lir aser

iba tatidang ya February 2025 nung tenzüksü.

Temsüa aliba candidates temi online ajanga www.joinindianarmy.nic.in nung tenüng zülüoktsüla. Iba dak sendakba nung yariteptsü asoshi candidate temi Army Recruiting Office den 7628023484 mesüra 03862-249012 ajanga mesüra email arorangapahar77@gmail.com ajanga tongteprateptsü akok, ta sangdong ajangasa ashi.

DC Mokokchung ajanga NH 61 nung long poksatsü melar

Dimapur, Aenjeti/January 31 (TYO): Deputy Commissioner, Mokokchung, Thsuvisie Phoji-i JKM Infra Works Guwahati, Assam dang lenmang ulushitsü atema DEF Police Church nungi Yisemyong tsüngta NH 61 (New NH 02), Angetyongpang

Tzu River area nung February 3, 2025 nikongdang 3:00 ako nungi aonung 10:00 ako tsüngta long poksatsü melaogo.

Ajisüaka contractor temi iba lenmang amshiba nüburtem takum aser ki o jen kumzüka ayutsüla aser Explosive Act/

Rule, 2008 nung aliba ozüng ajunga sülen anidaksüla, ta ashi.

Takum aser ki o jen raksatsüra JKM Infra Works LLP khuret asütsü aser iba totuyuba ya February 3, 2025 nü atema alitsü, ta sangdong ajangasa ashi.

Dept. of Health & Family Welfare-i MA & MTS shimogo

Dimapur, Aenjeti/January 31 (TYO): Department of Health & Family Welfare ajanga December 14, 2023 nü advertisement sangdongba ama aser sorkari December 17, 2024 nü agizükba ama merit yimya nung Mpai Sub Centre nung

Medical Attendant inyaksü Health & Family Welfare, Hailungring aser Ipeusi Nagaland Kohima nungi appointment order nung Multi-Tasking Staff meshitsüla, ta sangdong ajanga ashi.

Ibai Gauhati High Court, Kohima Bench ajanga August 2, 2021 obendang nung shia aliba ama inyakba lir.

Health & Family Welfare, Nagaland Kohima nungi appointment order meshitsüla, ta sangdong ajanga ashi.

Ibai Gauhati High Court, Kohima Bench ajanga August 2, 2021 obendang nung shia aliba ama inyakba lir.

DC Niuland-i mozüki nung tanur asor atema metetdaksür

Dimapur, Aenjeti/January 31 (TYO): Deputy Commissioner, Niuland ajanga district nung aliba nübur ajunga dang Niuland District kübok CHC/PHCs mashi nung tanur asoba atema teyari sen 5000

agütsütsü, ta sangdong ka nung office nung doctor indang certification report agütsütsü metetdaksü. Iba dak sendakba nung mobile number 6909803445 nung tongtepratep sütettsü, ta sangdong ajangasa ashi.

CHC Niuland mesüra Niuland District kübok PHC mashi nung tanur tetsür/tebur asoba ajunga dang Deputy Commissioner, Niuland indang

office nung doctor indang certification report agütsütsü metetdaksü. Iba dak sendakba nung mobile number 6909803445 nung tongtepratep sütettsü, ta sangdong ajangasa ashi.



Research and Development Cell, Dimapur Government College ajanga 'Sustainable Rural Development, Climate Change and Food Security' omen nung ajemdaker January 31, 2025 nü National Seminar (hybrid mode) nung ayongzükdang tangokba noksa ka nung shisalen sayur aser shilem agirtem angur. Iba sentong ya National Bank for Agriculture and Rural Development (NABARD) ajanga sponsor süa liasü.

Bhandari nung Tuberculosis screening camp agi



Dimapur, Aenjeti/January 31 (TYO): National Tuberculosis Elimination Programme (NTEP), Wokha District aser Community Health Centre (CHC), Bhandari ajanga January 31, 2025 nü JAN-JAN KA RAKHE DHYAAN TB-MUKT BHARAT ABHIYAAN, (NI-Kshay Shibir) ayongzükba liasü.

Iba sentong nung Renben Tsanglao, Senior Treatment Supervisor (STS), Wokha ajanga jembidang TB tashidak tekeraba nung puteta asü-amaba ajemdaksütsü aser cases tasen nokdangtsü aser Tuberculosis tashidak ajunga

samadaksütsü nükjidong nung Government of India ajanga tenzüksüba 100 days Intensified Campaign nung shilem ka ama Health Screening Camp ya ayongzük, ta ashi.

TB kera tendanga putettsü nüngdakba, shirangba yimya indang jembidang, tsüboa melie arua tendangtsü tongtipang lir, ta pai ashi.

Iba tashidak okshia samadaksütsü asoshi sorkari yaritepba aser mera balala agiba indang pai rateta ashi.

Iba sülen angati Non Communicable Diseases, (NCD) X-Ray, Blood aser Sputum tendanga liasü.

Old Age, Widow aser Disability Pensioners dang metetdaksür

Dimapur, Aenjeti/January 31 (TYO): Directorate of Social Welfare, Nagaland, Kohima ajanga tuyuba ama Old Age, Widow aser Disability Pensioners ajunga dang NSAP portal nung inoktsü asoshi January 2025 tashinung pei Date of Birth tejangja aser Contact Number agütsütsü atema totuyuba agüjaka beneficiary aikati tang tashi magütsü lir, ta I. Mangliyangba, District Welfare Officer,

Mokokchung ajanga sangdong ka nung ashi.

Anungji tang tashi Date of Birth aser Contact tejangja magütsü alirtem dang February 15, 2025 tashinung agütsütsü tasemben aser tatembang buba metetdaksür, ta sangdong ajanga ashi.

Maneni temaba ketdangsür temi tuyuba ama nüngdakba details magütsür nem pension magütsütsü, ta sangdong ajangasa ashi.

Centre sorkari tribal nisungtem atema nendaka inyaker: Murmu



New Delhi, January 31, 2025: Hokolbarnü Parliament House anaprong külem senden nung jembitsü atema Tir, Droupadi Murmu Parliament House-i arudang tangokba noksa nung angur.

New Delhi, January 31 (Agencies): Hokolbarnü Parliament House anaprongla külem senden nung linük Tir, Droupadi Murmu-i, sorkari tribal nisungtem jenjang ajungkettsütsü atema kanga tongtibang süa inyaker; India nung nuchiso anguba sülen-a küm aika tribal nisungtem sendoka liasü, ta metetdaksü.

Budget senden tenzuka House anaprongla nungi züngsemtem den jembidang Murmu-i, sorkari meranga inyakba ajanga tang linük nung Dalit nungertem, tribals aser maangka mangur nisungtemi tajanzük tuluba agiteter, ta ashi.

Laisa, "Asenok nüchiso anguba sülen-a tribal nisungtem küm aika sendoka liasü. Ozü sorkari tribal nisungtem ajungkettsütsü atema kanga tongtibang süa inyakogo," ta ashi.

Dharti Aaba Janjatiya Gram Utkarsh Abhiyan aser PM JANMAN Yojana ama schemes ya tongtibang tatishitsü lir, ta lai ashi.

"Linük nung tribal kaketshirtem nem shisaliok tajung agütsütsü asoshi sorkari special schools mesüra Eklavya Model Residential Schools (EMRS) 670 dak tali lapokogo. Tang EMRS nung tribal kaketshir lakh 1.25 shi lir," ta lai metetdaksü.

Tesüiba küm 10 tsüngda tribal nütsüng teimba aliba tesemtem nung sorkari medical college 30 lapokogo, ta Murmu-i metetdaksü.

Tribal nisungtem rongnung sickle cell tashidak samatsütsü atema sorkari special mission ka tenzükogo aser tang tashi nung National Sickle Cell Anaemia Elimination Mission kübok tribal nütsüng crore 5 shi tendangogo, ta lai metetdaksü.

"Tribal nütsüng crore 5 loktiliba-rongsenketzüng jenjang ajungkettsütsü atema sorkari Bharti Aaba Janjatiya Gram Utkarsh Abhiyan tenzük. Iba mapatong ya mezüngbo Pradhan Mantri Janjatiya Unnat Gram Abhiyan (PM JUGA)

ama tenzük," ta laisa metetdaksü.

Ano külen Murmu-i, India nung tashi, mapatong aser nukjidongtem nung alimai India dak tamang kateter, ta metetdaksü.

Iba dak sendakba nung lai Quad, BRICS, Shanghai Cooperation Organisation aser G20 teloktem nung India-i tongti shilem agiba lemsatep.

"Tanübo India-i alima sabang tulu aika nung pei tangatetba lemsatepteter. India nung G20 Summit takok ngua akaba aser Delhi Declaration ya tongti tatishitsü lir," ta lai ashi.

"3buba Global South Summit, India-ASEAN Summit aser India-CARICOM Summit tem nung asenoki Global South dak sendakba tongtibang onüktem asenoki benokogo," ta lai ashi.

Caribbean Community (CARICOM) ya intergovernmental organization ka lir aser iba telok nung Caribbean region nung aliba linük 15 densema lir.

Nirmala Sitharaman-i Parliament nung Economic Survey benok

New Delhi, Aenjeti/January 31 (Agencies): Hokolbarnü Union Finance Minister Nirmala Sitharaman-i Parliament nung Economic Survey 2025 benokogo.

India nung GDP shilem 6.3 nungi shilem 6.8 aintsü, ta Economic Survey nungji shia lir.

Sorkari sayaba economic survey nungji yamai shia lir, "Linük rongsenketzüng tashi itta lir, external account tashi itta lir, saru jenjang junga lir aser PCE junga lir. Item nungji ajemdaker Financial Year 26 nung rongsenketzüng ainbaji shilem 6.3 nungi 6.8 asütsü onoki imlar."

Iba survey nung West Asia, Ukraine aser Africa densema

alima tesem balala nung rara ajanga rongsenketzüng nung kongshiba kulitem shia lir.

Sangküm GDP ainbaji shilem 6.3 nungi 6.8 tashi asütsü.

2024 küm alima nung manufacturing jenjang ajema akümba ajanga alima rongsenketzüng junga main, ta survey nung shia lir.

Alima tensa mapang, rara aser shishilemba mapatongtem kulitem ajanga alima rongsenketzüng jenjang tashi maitba aküm.

India nung GDP shilem 6.4 shi aintsü, aser ibaji talisa aluyimba aser services ajanga asütsü.

Economic Survey ya küm

shia Union Budget jakdang sorkari benokba document ka lir. Iba document nung taoba union budget asadanga aser taruba union budget atema asadanga osangtem sangdonger.

Economic survey ya chief economic adviser lenisüba nung Financy Ministry kübok Economic Division of Department of Economic Affairs-i renemer.

Akhidangbo economic survey ya Union Budget shilem ka ama benoka liasü, ajisüaka 1960s mapang nungji iba survey ya budget den balala benoker.

Honibarnü Finance Minister-i Union Budget benoktsü.

Iran nung India nung 3 sama; Iran ketdangsertem den jembidar: MEA

New Delhi, January 31 (Agencies): Hokolbarnü Ministry of external affairs (MEA)-i, India nung shishilembar asem Iran-i aoba sülen samaogo aser iba atemaji parnoki Iran nug ketdangertem den tongtepratepa jembidar, ta metetdaksü.

Osangbenertem den jembidang MEA otongdar, Randhir Jaiswal-i, "Sorkari

parnok kibong züngsemtem den tongtepratepar. Onoki Delhi nung aliba Iranian Embassy nung ketdangsertem aser Tehran nung aliba Iranian ministry of foreign affairs den-a tongtepratepa jembidar," ta metetdaksü.

"MEA aser Tehran nung aliba Indian Embassy-i Iran ketdangsertem den jembidar aser parnok dang samaba sensotem bushiba maparen

nung yaritepa parnok dak kecha mataloki meyipa arutsü atema yaritepang ta shiogo," ta Jaiswal-i metetdaksü.

MEA otongdarisa Russia nung samaba India nung osang-a metetdaksü.

"Russia nung India nung 16 samaogo aser onoki iba atemaji Russia nung ketdangsertem den jembidar," ta Jaiswal-i metetdaksü.



MULUNGNEN O



(1st November 1941 to 07th January 2025)

Onoki teti akhümtsüba meima aliba Kinungbu & Tsürabur A. IMTITOSHI LONGKÜMER (Retd. Teacher) Changtongya Town, iba lima nung Tsüngremer taochi temoatsü manung arishia küm 83 atena jangratema lia arur, Kibubai lezmütsüba anogo 7th January 2025 arishi tembangba mapang nungi Lepko tembangba mapang tashi nung Kija, Kibong, Medemer, Temeimer, Kinunger, Arogo aser Lokti balala shirnokisa nübu & rongsen den sarasadem agi onok den tsüngdong arua yaritepogo aser tsüngdong marutetaka tesem balala nungi rongsen bendaktsüba den sarasadem agi onok yariogo, nenok ajak dang kangasa pelaba lemsateper.

Onok mangyimjashi mapang nung alidang, nenoki aria bilema temeim agi yariba ajanga onok molungnena anisüngzükdaksüogo.

Yariteper ajak kasa tongtibang, ajisüaka, item teloktem dang tenüng teta pelaba shisemer :

| | | | |
|----|--|----|--|
| 1 | Changtongya Town Baptist Arogo | 14 | Medical Ward Youth Union, Changtongya Town |
| 2 | Changtongya Yimsen Baptist Arogo | 15 | GHS Changtongya-B Staff Union |
| 3 | Nepali Baptist Church, Changtongya Town | 16 | R.C.Chiten Jamir Memorial GHS Changtongya Staff Union |
| 4 | Konyak Baptist Fellowship, Changtongya Town | 17 | SMDC, R.C.Chiten Jamir Memorial GHS Changtongya |
| 5 | Langpangkong Tzükong Mungdang | 18 | Pensioner's Association Akhoya & Changtongya Town Unit |
| 6 | Langpangkong Kaketshir Mungdang | 19 | Changtongya Longkumer Mangkotongmen Kidong |
| 7 | Akhoya Kosasanger Putu Menden 6 Tatar | 20 | Mongkumjangtsür Telungjem, Changtongya Town |
| 8 | Changtongya Kosasanger Putu | 21 | Lanuwa Zünga, Changtongya Town |
| 9 | Changtongya Yimsen Village Council | 22 | Molungtok Zünga, Changtongya Town |
| 10 | Changtongya Yimsen Senso Telungjem, Changtongya Town | 23 | Hokolbar Sarasadem Telok, Changtongya Town |
| 11 | Changtongya Yimsentsür Telungjem, Changtongya Town | 24 | Glee Club, Changtongya Town |
| 12 | Antsützüba Ward Yimden & Kiyongertem, Changtongya Town | 25 | Animesor Telok, Changtongya Town |
| 13 | Antsützüba Ward Youth Organisation, Changtongya Town | 26 | Christian Marching Group, Changtongya Town |

Onok dang meima yarir kija & kibong ajak tenüng teta iba osang kaket "Tir Yimyim" nung pelaba meshitetba asoshi sasaseta bilemer. Nenok dangi tsüngdong arua pelaba onoki meshitettsü aser nenok nem meyipa agütsütsü kecha maka. Ajisüaka tulusang Tsüngremeri nenok ajak molamoshia moajang ta onok sarasadem.

-Temeim Kinungtsü, Chirurtem, Semchirtem, Anükabangtem & Kinungertem

SC-i Election Commission dang polling video bendentsü tuyu

New Delhi, January 31 (Agencies): Polling station shia nung voters 1,200 tashi dang lezmükja aliba nungi 1,500 kümtsütsü atema telemtetba agiba anema ken o benoka lir, iba dak sendakba nung Hokolbarnü Supreme Court-i Election Commission (EC) dang election agidang tangokba video clips ajak rizünga yuang, ta tuyuogo.

Chief Justice Sanjiv Khanna aser Justice Sanjay Kumar nati akümba bench dang Election Commission of India (ECI)-i Indu Prakash Singh-i benokba ken o dak sendakba nung telangzüba agütsütsü atema ano mapang agüjang, ta mepishi.

Yaküm August ita nung Election Commission-i polling station shia nung voters teimba kümtsütsü atema telemtetba agiba anema Singh-i SC nem temepishiba ken o agüja liasü.

"Telangzüba agütsürtem atema ken o jembitsüri mezüngbuba nung affidavit nung telangzüba agütsütsü atema ano mapang meshisemer. Tanü nungi tenzuka hopta asem tsüngda affidavit nung telangzüba agüjang. Telangzüba agütsür

dang tamalen parnoki inyakba ama maneni CCTV recordings rizünga ayutsü tuyur," ta bench-i metetdaksü.

Taküm January 15 nü Supreme Court-i Centre aser Election Commission na dang Congress general secretary Jairam Ramesh-i benokba ken o dak sendakba nung telangzüba agüjang, ta tuyua liasü.

CCTV recordings public dang mesayutsü densema tawa ozüng kar yanglushiba anema Congress lenir Ramesh-i SC nem temepishiba ken o ka agüja liasü.

Singh-i, election ya ghonda 11 shi agir aser vote ka agütsütsü atema second 60 nungi 90 tashi mapang agir, anungji EVM ka dang aliba polling station nung anogo ka kija nung nisung 660 nungi 490-i dang vote agütsütettsü, ta Supreme Court dang shia liasü.

"Iba ama tensa ka nungji voters shilem 20 ibo vote agütsüba mapang süiba tashi nunga vote magütsütettsü aser pei temeden amshia vote magütsütettsü. Republic mesüra democracy linük ka nung iba ya tagizüktetla masü," ta Singh-i metetdakja liasü.



TIR YIMYIM

YIMOBILEM (EDITORIAL)

DIMAPUR

KÜPTOKNÜ

TSÜKLAI 01, 2025

Hindu nunger tzüsenba benjong

Uttar Pradesh state nung Prayagraj ta ajaba tesem nung Hindu nunger Maha Kumbh benjong amongba sentong nung January 29, 2025 anepdang mesangwai lia lokti tulu nungtep dang nisung semer dak tali ajemseta asüba osang asenoki angashiogo. Asenokibo Hindu nunger benjong Durga Puja aser Diwali na amongba metetba aser anguba dak alaka alima tesem balala nungi nisung crore dak tali ayongküm nung adenshia tzü nung tzüsentsü atatepba aser tzüsenba benjong indangbo memetet aser mengudang, anungji tang ama lendong atalokba osang angashidangang meteter. Alima nung Hindu yimsü ya tamangba yimsü tejentem rongnung ka lir. Iba yimsü nung tanü Khristan-temi beshiba yimyatema karbo mesüktepa lir. Aji oda, Khristan-temi Yisu Khristaji pei taküm nung kibur aser kümtetdakba ta agizükba tamaitü tzü nung tzüsenba ama, Hindu nungertema pei taküm nung temenen shitokba tamaitü, tang ama Maha Kumbh benjong mapang ayong nung peisasa temang ajak angüma ia tzüsener. Hindu nunger tamangba lipok otsü nung ashiba agi, mapang ka anung nung tuagi tsüngremtem o mojingtem na kodanga masütsüba taküm tzü aliba chipo raktep dang, idak nung jagi taküm tzüji alima leni jenzüka lua tesem pezü nung anen. Item tesem pezüji India nung Prayagraj, Haridwar, Nashik aser Ujjain lir ta parnoki amanger. Ibayongji, Hindu nunger asoshi item tesemtemji temeshi yimtittem aküm aser item yimtittem anasa aliba ayongtem Ganga aser Yamuna ama ayongtem ya Hindu nunger asoshi temeshi ayongtem lir. Ibayongji, taküm iba Maha Kumbh benjong sentong ya Prayagraj nung January 13 nungi February 26 tashi amonger. Item anogotem nungjia temeshi ayong nung tzüsentsü asoshi tongtibang aser temeshitiba anogo kar lir aser item anogoji ita anü petinu takzür shimteter. Taküm küm asoshi item temeshi anogotem rongnung January 29 yaa ka liasü. Ano, Hindu nung Maha Kumbh benjong nung tzüsenba maparen nung tongtibang kaji, tzüsenba mapangjia mashi mapang ka nung masü saka anepdang anü matokdang tzüsenbajisa temoatsüba ta parnoki amanger, anungji January 29 anepdang 3:00 ako ya parnok asoshi tzüsentsü mapang tajungtibaji liasü. Iba mapang nungjisa tzüsentsü atema nisung meyerijang ta masü saka lakh dak tema adenshia tama asütsü raktep dang nisung ajemsettsüsa atalokba lendongji atalok. Prayagraj nung January 29 anepdang lendong atalokba mapang ya 1:00 ako o 2:00 ako na tsüngda liasü aser lendong ataloker külena iba kasa anogo nung Ganges ayong nungji tzüsener ajak agi nisung crore tenet ser tesadang (9,50,00000) dak tali liasü. Iba Maha Kumbh benjong nung adentsü asoshi Hindu nunger putirtem (sadhur) tesem balala nungi arua shilem agir aser parnoki nübortem dang Hindu yimsü tamangba yimsü nung tekümtet aser nisung sür külena ano kasa nisungji tangar tetsük bok nungi tanaben asotsüba indang sayur. Atangji, Maha Kumbh among dang ya alima tesem balala nungi adenshia India nung teka agi yanglutetba süoshi aser osettsüsettem ayoktsü aser alitsü mapang tajung angur aser chiyongtsü tatsük talem balala chiajema pelateper. Nisung crore aika senteper asünungji, yimti nung akaba hotel-tem nungbo masemer, anungji tesem balala nung sü ki yanglur nisungtem anendaktsür. Iba Maha Kumbh benjong nung Hindu nunger sadhu-temi anir lokti tulu yimti yimdong sema jajar aser aonung lokti sentep mapang lia yangji temo milen amshia par tamangba aser sobaliba ken atenba sentong agibaji parnok asoshi taküm nung mamatetsüba temoatsü mapang ta züngshir. Ajak dak alaka Ganges ayong nung anepdang yakta mesangwai temang aser tokolak ajak angüma yia tzüsenba agi pei taküm nung temenen shitoker aser tekümtet angutsü anasai aoer ta amangba tamang mapabaji lir. Aji oda, Maha Kumbh benjong sentong ya Hindu nung asoshi temenen shitoker tekümtet bushia aoba benjong ka lir. Ibai küm ter ana nung khen amonger. Atangji, kasa tzü nungsa tzüsenaka Hindu aser Khristan nati amangba aser angateta beshiba naji balala lir, saka asen tetsü tebouia tzü yabo tsüngrem tashi dena lir ta bilema tekülem yimya kar nungbo amshia aru.

OLEMSABANG

Na-a liang Tangar-a lidakjang

P. Renthly Jamir

(Yashi adok nungi...)

Ano tasüngdangba ka langzür, Molungkimong putu yimsüsürtemi Molungyimsen akümstsü temelaba kecha magütsü, na yangi teka temeyong joktsü makok, memetetra asüngtanger jembia züluang. Tamalen Dr.Clarki Godhula Brown Merangkongi yokba indang züluogo, pa meyipa atuba, "saka kodang Godhula Brown Molungkimong atong idangjibo Molungkimong tebu tedii yimsen akümstsü melar liasü" MERANGKONG AROGO OTSÜ page-102. Iba dang ya temelaba agütsü ta ajar.

Ano ka nung kibong 8-i missionary tang miima 1885 nung sü achiba par arogo otsü nung likaji koda? P.Renthly Jamiri Molungyimsenji Limapur kata mali, temeshi yimkong ta mezülu. Saka yamai zülu, Molungyimsen nungbo Limapur mali arogo nunger tesa ta masü. Tetezü limapur dena yim aküm aser sü achitsü limapur mapa, yangji tangar yimer metsüdaktsü kecha mali. Kütsü o kübou nadibo 1935 nung sü chigo ano kütsü o kübu nadia 1942 nung nashi chiogo. Saka onok yimer arogopur shingiaia tebang matsük maitü, yamai atala-a mesensatsü.

Ano bogus board-i züluba ka nung Dr.Clark record nungbo 1895 tashi nung arogo pungu dang angur ta lir. P.Renthly Jamir iba indang ashishitepa zülur masüji arogo kwi ali mali kecha mezülu saka pai jungjunga metetbaji aser angubajibo 1898 tashi nung Molungkimong nung arogo tenteta mali asü ta-ang metet. Kechiyong 1898 Ao mungdang Impur nung Dr.Clark dena sentepdang Arogo tenteta aliba tenüng - Molungyimsen, Wameken, Yajang, Lirmen, Impur aser Merangkong arogopur nütsüng ajak agi 177 tzüsenba nisung 140 ta-ang lir. ABAM küm tatem Mungdang tezülubattem (1897-1971) page-9. Aser iba tezüluba nung Dr.Clarki aji tai, kü record nungbo Molungkimong-a lir ta ashiba mangur. Aser asenokbo Clark record masü ABAM tezüluba ang agitsü.

Ano ka nung 1886 Clarki züluba shiti ya Molungkimong nungertemi bener Wokha jagi aoba akodi. Ni 1886 nung atalokba otsü memetet saka 1888 Chang nungeri Ao yim ana amakba atema Clarki British government nem osang agüja shiti bentepba, atema dang zülu. Aser Dr. Clark yiar mesüra pa yamato maaksüja ajapua mezüngmeshia meintoker yamala tenyaba nung par yimer nübujibosa mamshitsü.

Dr.Clark yim tasen akümi aoba otsü ya An chanua tera taintemibo ajaki meteta lir. Saka iba ocet rajemtsü ano khen meyipa lephsir.

So on the day appointed, the missionary with fifteen families bearing on their back all of their own and the missionary's household goods marched down through the gateway of Dekha Haimong Stokade amid the jeers taunts Scofis and threats of the villagers who shouted "Go now but you'll soon come back" and one man posing astride the gateway of the Stokade indicated to them humility and greater subjection under which they would return. A.Cornier In India - page-20. Kibong terpunguji pei pei khu den missionary kidang akaba oset ajak bener Dekha Haimong Süngküm ajanga aodang yimertemi ajapua atala-a sensaja menütsü. Tang oang saka nenok meyipa arutsü ta nisung katibo yim Süngküm nungji ajemokja mezüngmeshiba onsara tulu liasü.

Ano ka nung pa kor nung ayip khu alenlok shiküp juli nung tzü aben aser prangbong ka bener yim sema jaja. Dr.Clark ya Ao limai Cowboy training agütsüi atu masü ta bilemer. British government arur kor lenmang mapi tashi Ao lima tekong tenem sema kor nung sanger jajatsü tamakoktsü.

(Maneni asüng adok nung angutsü...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Tsüngrem atalaba ozüing kübok tekolok meshidak Khristan ka apu



Farhan Javed Masih

January 31, 2025: Tan hopta Pakistan nung police-i Tsüngrem atalaba/mezüngmeshiba ozüing kübok metetsümonga tekolok meshidak Khristan ka nem tai tongloktsü.

January 26, 2025 nü Pakistan nung Punjab province kübok Sahiwal nung Ghala Mandi police-i arrshi küm 28 Khristan, Farhan Javed Masih apu.

Chak 134-9/L yimdak Muhammad Bilal Khan-i, Masih-i Islam yimsü aser ainkar anema jembiogo ta tai tonglokja liasü, ta Masih tetsü, Parveen Javed-i ashi.

"Onok kidang lia Bilal den Muslim nung kar arua onok dang, Farhan-i Tsüngrem mezüngmeshiogo ta ashi. Ni parnok dang, pa sowar anungji pa dang tai tokang ta ashi, ajisüaka parnoki tatok magütsüi police aja," ta tetsüi metetdaksü.

Javed kinüingbu küm trok tejaklen asü. La ya tanur asem tetsü lir.

Tebu süadokba sülen Farhan Masih tekolok meshidaki aküm.

Pa teno tanutsüla Anum-i, "Yimer ajaki pa sowar kümogo ta meteta dang lir. Tsüngrem mezüngmeshiba ozüing kübok pa apuba ajanga pa ano tamajungba dang akümtsü. Shidakba agibo police-i pa tekolok meshidakbaji tama tendangba tajungba süla," ta ashi.

Associate Reformed Presbyterian Church nung züngsem, Parveen Javed-i, lar jabaso küm 4 nursing course renemba sülen Sahiwal nung aliba Adam Welfare Hospital nung inyaka liasü, ajisüaka pa tekolok meshidaki akümba agi 2023 küm mapa nungi anenja liasü, ta ashi.

"Onoki pa treatment agidaksütsü merang saka makok. Pa mapa nungi anendaksüba sülen nungi pai anogo piyong yim meketa tamangtsü makaba o jembia senzür. Pa tekolok meshidakbaji yimer ajaki meteta lir," ta tetsüi ashi.

Pakistan nung Tsüngrem mezüngmeshiba ozüing kübok aibelenertem dang senchi achir mesüra tasüba temerenshi-a agütsütsü akok.

Muslim nungi Bilal Khan-i, "Ni atsu inyaka lia Farhan Masih arur kü dang 'Nenek yimsü nung temeshi nisungtemji yazü aser ni Muslim nungertem rongnung meliner, kechiyong nenok tekübok jenjang nung lir' ta ashi," ta metetdaksü.

Sahiwal nung aliba Baptist Arogo nung Bishop Abraham Daniel-i, iba yimdakji Khristan kibong 150 nungi 200 shi lir, ta ashi.

"Iba osang ni angazükba sülen ni idangyongjisa police ketdangsertem den tongtepratep aser Khristantem nem security agüjang ta

mepishia liasü. Mapang shidak nung police iba tesem jagi yokba ajanga lendong kecha matalok. Tangbo tensa süngjema lir," ta pai metetdaksü.

Daniel-isa, Masih tekolok meshidak, anungji shidakba agibo Tsüngrem mezüngmeshiba ozüing kübok tai tongloktsüyonga pa maputsüla, ta ashi.

"Farhan-i pai bilemba jembioba mazüokteter aser pai jembioba o nung lendong keta alibaji pai memetet. Pai metetsümonga Tsüngrem mezüngmeshi masü. Iba ken o angadanga mapang nung court-i pa tekolok meshidakbaji züngshitsüla," ta Daniel-isa metetdaksü.

Church of Pakistan nung Moderator, Azad Marshall-ia, iba ken o nung tai tonglokja alisangji tekolok meshidak ta meteta lir, anungji pa aputsü alibaji police ketdangseri nokdangtsüla liasü, ta ashi.

Marshall-isa, "Onoki Pakistan nung Tsüngrem mezüngmeshiba ozüingtem yanglushitsü atema aiben mepishiogo, saka onoki mepishibaji magizüker," ta metetdaksü.

Lahore nung amenoka aliba advocacy group 'Center for Social Justice'-i ashiba agi, 2024 küm kija nunga Pakistan nung Tsüngrem mezüngmeshiba ken o 343 benokogo aser ken o 19 bo Khristantem anema benokba liasü.

Pakistan nung Tsüngrem mezüngmeshiba ozüing kübok tai tonglokja ken o benokba kanga bulua akümba anema yaküm November 7 nü U.N. Human Rights Committee (UNHRC)-i Pakistan dang iba ozüing agienang mesüra yanglushiang, ta mepishia liasü.

Operation Blessing teloki Los Angeles nung timtemertem yarir



Operation Blessing team ka noksa nung angur

Los Angeles, January 31 (Agencies): Los Angeles aser temeket nung merok mi lendong tenzüka sülen anogo ishika tsüngda Khristan melungtet telok 'Operation Blessing'-i iba lendong agi kongshirtem yaria arudar.

Operation Blessing nungi Hayley Henson-i, "Mi lendong mapang nung nisung aika prokshio. Nisung aikati parnok tarutsü tia metetet. Anogo shia parnok nungdaktem peritsütsü atema onoki inyaker,"

ta metetdaksü.

Operation Blessing-i nungdakba osettsüset aser chiyungtsü alia mi lendong agi kongshir meyirjang aika yaria arudar.

"Tangari magütsüsetba teyari onoki agütsütsü atema onoki kanga shisadanga inyaker," ta Operation Blessing nungi Steffany Horton-i metetdaksü.

Operation Blessing-i L.A. Dream Center aser Cathedral Arogo den longjemer Altadena nung mi agi kongshirtem nem

tzü, hygiene kits aser tanga nungdak balala agütsür.

Home Depot nungi John Cruz-i, "Onoki gloves, merükmejudang amshiba supplies aser N95 masks agütsür. Nisungtem pei kidangi meyipa aotsü atema onoki item osot agütsür. Ano ki rongdoker alirtem-a ibaji ajanga tajanzük angur," ta metetdaksü.

Operation Blessing nungi Horton-i, "Onoki takoksa angurtemi lemsatepba angur aser parnok atema sarasademtsür. Onoki parnok dang temeim sayur aser parnok dang nungi tangzükba akatsü meranger," ta metetdaksü.

Operation Blessing-isa First Responders nem-a sleeping bags agütsüogo.

LA nung merok mi lendong atalokba sülen Arogotem, Khristan melungtet teloktem aser temelungertem aikati timtemertem yari tenzüka liasü.

Horton-i, "Parnok dak azüiter sarasademtsüba ajanga nai parnok dang Yisu temeim sayuteter," ta ashi.

ANO GO ABEN TSÜNGREM DEN

Temeshi Takümü Tepela Taküm

"Saka temeshipur lenmangji anepung sangwa ama lir, kobai anüngdang matong tashi tali tali sangwar" (A. Shin 4:18)

Temeshiba medeni asenoki Tsüngrem angutsü makok (Ibri 12: 14). Pai asenok meimer süra, Pai asenok temeshiba mekümdaksütet asü ? Saka satani temeshiba lenmang nung tebilemba aika asen shisatsü nung agütsür. Asenok tatemzükba satan kümdaksür. Aseni meinyaktetba ajak satan dak atonger. Tanü asenoki itemji kar shisadanger.

Yisui tenem nung sayutsüngiba mapang, "Mulungsentsü merükmerüka alirtemi moa" ta sayutsüngi. Shirnok mulungsentsü nung tamajung bilemba mali parnokji tepela taküm aser tanela nung teti azükarua alitsü. Temeshiba takümü tangar nungi pilar azüngmeyakdak kija rongjena aliba taküm masü, saka tamang kateta Khristan mapa nung Tsüngremi mulungba ochi agi mapa ajak inyakba taküm. Temeshibaji Khuret lir:

Andrian Rogers-i yamai ashi - "Temeshibaji Khrista dangi aoba lenmang masü; Khristaji temeshiba lenmang lir". Kodang ibai timi mangatetter, temeshiba takümü khuret akümer. Kodang asenok temulungjang ajunga agi kar meimdir asenoki lenmang ajak nung pa peladaksütsüsa inyaker. Tenyar Yohani küm 60 tashi pa den jajadang ya meteta liasü. Temeshi tambur nisungi ya zülü - "Kechiyong asenoki pa ozüngtem benshitsü, ya Tsüngrem temeim lir" (I Yn. 5:3). Shitakba nung temeshi takümü anisüngzük taküm.

Nigeria nung tekülem sentong tagidak mapang Arogo lenir ka khaset

January 31, 2025: Nigeria nung Ogun state kübok Celestial Church of Christ Arogo nung Adetula khaset, ta International Christian Concern (ICC)-i metetdaksü.

January 19 (Amongnü) anepdang tekülem sentong tagidak mapang nung nisung kari arrshi küm 54, Adetula khaset.

Adetula ya sarasadem nung takang liasü. Pai Arogo züngsemtem junga tenzüker aser Ogun State So-Safe Security nunga commander liasü.

Tenük kuli alirtemi ashiba agi, tekülem sentong tagidak mapang nung nisung asem Tenla ki telungi aitba sülen injang khaloktsü.

Adewala Amos-i, "Adetula ya Tsüngrem tsüsuba lenir ka liasü aser nüburtem tenzüksü atema bendanga agütsüba lenir ka liasü," ta ashi.

Paisa, "Khristan anemertem nungi onoki timtem aika ajangshir. Khristantem sademsadema tekülem agitetsü atema temeden angutsü asoshi ajaki longjemer inyaksüla," ta paisa metetdaksü.

Ogun State Police-i aibelenertem maitsü jangjaa aputsü atema maparen tenzüker.

Police Public Relations Office-i sangdong ka ajanga, iba ya ozüing alema inyakba lir, anungji onoki Khristantem temeden atema inyaksü aser aibelenertem aputsü, ta metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Techinütsüka

(adj) chinüa repringba mesüra bilemba (delicious, envy to eat) * Kütüsü asoba aon ajak techinütsüka soteter.

Techipet

(adv) chinüa anen, mechishi (was not enough to eat, not fully satisfied, still wanting to eat) * Onok aika asüba agi shi lon tajung agi chipet (techipet).

OLONG PAITEP # 7052

Grid for crossword puzzle #7052 with numbers 1-18.

TIPILEN

- 1. Mosai züluba kaket ka - (6)
4. Teku nembangba sobotsü - (4)
6. Puteper - (4)
7. Kidang Atem yagi yanglur - (6)
10. Teputep - (9)
15. Aori yangluba aon ka - (6)
16. Yirusalem - (4)
17. Per tulu - (4)
18. Ambangyima agiadok - (6)

LANGTSÜNGLEN :

- 1. Junger ta ashi - (5)
2. Kenüa mati - (4)
3. Tulu masü - (4)
4. Yashi o asüng na yongtsü - (4)
5. Ajurutepdak - (6)
8. Amtak - (3)
9. _ _ _ en - (3)
10. Na shiba - (6)
11. Amo-amor - (5)
12. Noklang nung 97 endok - (4)
13. Kidong ka - (4)
14. Tekong sobotsü - (4)

OLONG PAITEP # 7051 TELANGZÜBA

TIPILEN :

- 1. Yimlibilem, 4. Anak, 5. Tangar, 7. Aya, 8. Arong, 11. Par, 13. Lemjem, 14. Oagi, 15. Molungzüng.

LANGTSÜNGLEN :

- 1. Yongya, 2. Moko, 3. Marok, 5. Teronem, 6. Nung, 8. Amajok, 9. Jangzü, 10. belem.

NAI-A YA METETTER MA



Ajaki yongyaseta aliba 2025 küm sayatsü aliba movie 20

- 1. Avatar: Fire and Ash
2. Star Wars: A Droid Story
3. Mission: Impossible - The Final Reckoning
4. Captain America: Brave New World
5. Star Wars: Lost Horizons
6. Spider-Man: Beyond the Spider-Verse
7. Ballerina
8. Mickey 17
9. Aladdin 2
10. Wicked: For Good
11. Fantastic Beasts and Where to Find Them 4
12. Tron: Ares
13. Omari: Pandora's Playground
14. Untitled Taika Waititi Star Wars Film
15. How to Train Your Dragon
16. The Nightingale
17. Wildwood
18. M3GAN 2.0
19. Star Wars: Lost Horizons
20. Naya Legend of the Golden Dolphin

COCOMI-i anti-narco-terrorist campaign tenzüksü mepeshi

Imphal, Aenjeti/January 31 (Agencies): Northeast nung yimjung aser terenlok atema lenmang lapoktsütsü asoshi asendenshir anti-narco-terrorist campaign ka tenzüksü atema northeast nung aliba state ajak indang Chief Minister tem dang mepeshia metetdaksüogo.

Iba temepishiba agütsüba ya Coordinating Committee on Manipur Integrity (COCOMI) indang convenor Khurajam Athouba-i Imphal nung osangbenertem den sensaksemba mapang ashi.

COCOMI inti senden ka amenba mapang parnoki NE state tem inang chief minister tem nem tezüluba nung

takhangba ka agütsütsü asoshi bangjemogo. Iba takhangba ajanga NE Chief Minister tem dang teyari meshiogo aser lokti anema inyaksangshiba aser NE nung ozüng alema inyaksanshirtem anema ajak longjemer anti-narco-terrorist campaign ka tenzüksütsü mepeshia metetdaksüogo.

Khurajam Athouba-i ashiba agi, tezüluba nung takhangba agütsüba nung COCOMI-i, NE atema anti-narcotics enforcement agency ka amenoktsü aser anti-narcotic campaign ka tenzüksü asoshi ayongzükogo.

Osangbenertemi iba

tezüluba nung takhangba ya NE state Chief Minister tem nem kodang agütsütsü ta asüngdangba mapang Kh Athnouba-i ashiba agi, iba takhangba ya hopta ka tsüngda agütsütsü ta langzü.

Convenor-isa, state nung Chin-Kuki narco-terrorist inyakyim bentettsü atema parnok inyakyim atsülangshitsü ta metetdaksü. Manipur sorkari ashiba agi, sorkar anti-drug trafficking agencies-i 2024 küm temesepba mozü seret 150,000 shi raksa intokogo, ta metetdaksür aliba mapang ka nung COCOMI-i parnok inyakyim asüngsanshitsü metetdaksüogo.

Assam: RPF, NCB-i sen crore 6.45 alang Yaba tablets apu

Guwahati, Aenjeti/January 31 (Agencies): Railway Protection Force (RPF) aser Narcotics Control Bureau (NCB) nati Hokolbar anepdang Guwahati Railway Station nung Silchar - Secunderabad Express nung senzüa aliba passenger ka ket nungi sen aika alang temesepba mozü puogo.

Osang ajanga ashiba agi, train ya platform number 4 tonga aruba mapang anepdang 6.40 ako nung meita aoba

sentong ya tenzüka liasü. Meita aoba sülen Coach No. NF GS-191127 nung ticket mali senzüa aliba temulung melemi bilemba nisung ka sota liasü. Bushisüngdangba sülen plastic packet tenet nung Yaba tablets seret 1.5 bena aliba nguteta liasü. Temesepba mozü ya shishilembadak sen crore 6.45 alang asütsü.

Sepaitemi pua alisang ya West Bengal nung Phalimari, Dinjata, Cooch Behar nungi

arishi küm 22 tain Rasid Hoque ta jangaago, aser pa ya Badarpur nungi New Cooch Behar-i oya aliba mapang apu. Pa ket nungi apuba temesepba mozütem ya NCB nem bendanga agütsüogo aser ken o maneni bushisüngdangtsü.

Hoque dang ken o ashishitsü atema pa NCB ket nung yua lir aser temzüng ozüng dak ajemdaker pa anema jenjang tapet agütsü.

Hoque dang ken o ashishitsü atema pa NCB ket nung yua lir aser temzüng ozüng dak ajemdaker pa anema jenjang tapet agütsü.

Hoque dang ken o ashishitsü atema pa NCB ket nung yua lir aser temzüng ozüng dak ajemdaker pa anema jenjang tapet agütsü.

Hoque dang ken o ashishitsü atema pa NCB ket nung yua lir aser temzüng ozüng dak ajemdaker pa anema jenjang tapet agütsü.

Manipur cabinet-i Arjuna Awardee Roshibina nem DSP mapa agütsü

Imphal, Aenjeti/January 31 (Agencies): Manipur cabinet-i Brehostibar aonung Arjuna awardee Naorem Roshibina Devi (Manipur nungi tetsür Wushu asayar) nem Deputy Superintendent of Police (DSP-sports) mapa agütsüogo, ta Chief Minister den sendaktepa aliba source kati ashi.

Chief Minister N Biren Singh lenisüba nung agiba cabinet senden nungsa, state sorkar kübok department balala nung mapa tapet apir asayar 80 shimtsü atema temelaba agütsüogo.

36 aser 37buba National Games aser 19buba Asian Games nung gold medal anguba asayar 80 nem Class III & IV mapa balala agütsütsü. Employment exchange inyakyim melenshia parnok nem mapa balala agütsütsü.

Senden nung talisa Naorem Roshibina Devi dak rangloker sensak asem, shibai Hangzhou, China nung 2023 küm 19buba Asian Games nung silver medal ka, Texas, United States of America nung 2023 küm World Wushu Championship nung silver medal ka aser

Moscow, Russia nung 2023 küm Moscow Wushu Stars Championship asayaba mapang gold medal ka nagua liasü.

Temetettsü kaji Arjuna Awardee Naorem Roshibina Devi nem India tir Droupadi Murmu-i 2024 küm January 9 nü Rashtrapati Bhavan nung tetushi Arjuna Award 2023 ya agütsüogo.

Manipur Angh Anusuiya Uiquey-ia 2024 küm January 13 nü Raj Bhavan nung Roshibina Devi nem sen lakh ka agüja liasü.



Jan. 31, 2025 : Arunachal Yuva Samanvay 4.0 Kombo Jirdin nung takok ngua tembangogo. Iba sentong nung Major General (Retired) Jerken Gamlin, Arunachal Pradesh Chief information Commissioner tongti tejaoker aser Brigadier Md Shahid Ahmad alakteta jaoker liasü. Kasa sentong nung Kento Jini, Minister for Law, Legislative & Justice, Sports & Youth Affairs, SJETA, Government of Arunachal Pradesh, aser Ms Mamu Hage, Deputy Commissioner of West Siang District nungertema shilem agia sentong nung aten.

ALI TAYOKTSÜ LIR

1. Old Showuba nung, 12397 Sq.ft. Four lane, fly over anasa.
2. Rs. 50 per Sqft. Aginüba tasazük angutsü.
3. (5 Pura) 1 Pura - 3,200,000/-
Contact : 9863826159.

Russia indang oil refinery ka nung mi adok

Moscow, Aenjeti/January 31 (Agencies): Volgograd tesem nung Ukraine nung drone teraksa ka agi Russia indang oil refinery ka dak kongshiba sülen mi adoka liasü.

Regional Governor Andrei Bocharov-i, iba oil refinery amakba indang Hokolbarnü metetdaksü aser ashiba agi, iba tesem nung mi adokba takaratiba nung temsep aser mapa inyaker ka yirur mozüki dangi anir oa liasü.

Ukraine-i Russia nung refineries, oil depots aser industrial sites tem raksatsütsü asoshi maka arudar aser tesüsa iba oil refinery ya makogo.

Ukraine indang Center for Countering Disinformation indang tekolakba Andriy Kovalenko-i, Volgograd refinery ya Russia nung refinery tulutiba rongnung ka lir, ta ashi.

Iba hopta tetenzüklen Moscow anütoklen Nizhny Novgorod tesem nung Lukoil refinery maka mi adokdaksü ta Kyiv-i shia liasü. Taoba hopta drone amshia Moscow southeast len Ryazan nung refinery ka amakba sülen iba refinery inyaksangshia anena

liasü.

Russia indang Ministry of Defence-i ashiba agi, Hokolbarnü Ukraine nung drone 49 khadangogo, kong Rostov tesem nung 25 aser Volgograd tesem nung ti khadangba densema lir.

Kasa mapang nung Russia-i manger mesangwa tsungda Ukraine kübok Odesa tesem drone amshia makogo aser iba mapang Chornomorsk yimti nung nisung pezü yirua liasü, ta regional Governor Oleh Kiper-i ashi.

Iba tesem amakba ajanga yimti nung electricity supplies dak kongshi aser yimti mozüki, administrative building, grain warehouse, ki ka aser truck aika raksa liasü, ta paisa shisem.

Kasa mapang nung Ukraine air force-i ashiba agi, parnok indang defence system-i manger mesangwa tsungda Russia-i yokba drone 102 nungi 59 bo khazüka yokogo.

Ukraine kübok Sumy yimti nung Russia nung indang drone temi residential block ka maka nisung teku tepsetba sülen anogo ka lir parnoki maneni Ukraine makogo.

Israel military-i Syria-Lebanon arrtsü nung Hezbollah pur amak

Tel Aviv, Aenjeti/January 31 (Agencies): Israel military-i Hokolbarnü ashiba agi, parnoki manger mesangwa tsungda Syria-Lebanon arrtsü len Bekaa valley nung Hezbollah pur amendaka aliba tesem aika makogo.

Army-i ashiba agi, parnoki amakba tesemtem nung ali telung nungi prangbong injang yangluba tesem aser Lebanon-i prangbong injangtem shibelener aoba dak sendaka aliba tesemtem densema lir.

Brehostibarnü Israel-i, parnoki Hezbollah puri yokba surveillance drone ka nokdangogo ta ashiba den, iba ya Israel aser Lebanon na tsungda ceasefire atema mulungtepba anema lir, ta shisem.

Hezbollah aser Israel na taoba küm November tatemlen ceasefire atema nangzüktepba liasü, koba 2023 küm Gaza nung rara tenzükba mapang tenzükba liasü.

US-i Deobarnü sangdong ka ajanga, Israel nung sepaitem Lebanon nungi atsungintsü atema anogo 60 latettsür aliba atsülangshia February 18 tashi kümtsüogo ta metetdaksü.

Mezüngbo tatembangbuba anogo ya January 26 nü liasü ajisüaka Israel-i atsungintsü memulungba sülen February 18 tashi atsülangtsüogo.

Tenangzüktepba nung Hezbollah pur arrtsü nungi km 30 shi pilar Litani ayong adena north leni atsügingba mapang Lebanon army iba tesemi yoktsü nangzüktepogo.

Lebanon army-i parnoki nangzükba ama minyak ta shia Israel-i atakzükja aliba mapang tashi nung parnok matsüingintsü ta jangja jangja metetdaksüogo.

November 27 nungi Hombarnü tashi nung Israel military-i Lebanon nung nisung 83 tepsetogo, ta Lebanon indang Ministry of Public

Health-i metetdaksü.

Israel nung sepaitem amenoka aliba tesemtemi meyipa aotsü merangba mapang yim daklir 228 yiruogo.

Iba hopta tetenzüklen Lebanon nung meyirejang aika pei kidangi meyipa aotsü merangba mapang Israel nung sepaitem southern Lebanon nung nisung 24 tepseta liasü.

Iba hopta Lebanon media ajanga, Israel military-i Taybeh jila aser Kfar Kila yimtsüng maka ceasefire anema inyaksangshio, ta metetdaksü.

Bodhbarnü southern Lebanon nung Majdal Selem yimti drone amshia amakba mapang nisung pongu yirua liasü.

2023 küm October 8 nü nungi 2024 küm November 26 nü tashi nung Israel nung sepaitem Lebanon kübok tesem balala nung nisung 3,961 tepset aser nisung 16,520 dak tema yiruja liasü.

Myanmar military-i state of emergency atsülangshir

Yangon, Aenjeti/January 31 (Agencies): Linük junga mazüokteti tesem balala nung telungpurtem den maneni raratepba aliba mapang ka nung Myanmar military-i state of emergency ano ita trok atema atsülangogo.

Military-i azüoka aliba National Defence and Security Council-i Hokobarnü linük yimtiba Naypyidaw nung senden ka amenba mapang emergency ta atsülangja liasü. Military-i sorkar atsünger küm pezü ajungtsü anogo ka lia linük nung emergency ya ano atsülangogo.

“Commander in chief aser acting tir densema National Defence and Security Council züngsem ajaki, 2008 constitution kübok section 425 dak ajemdaker linük nung state of emergency ya ano ita trok atema atsülangshitsü telemteba agiogo,” ta kasa sangdong ajanga metetdaksü.

“General election takok ngua agitsü atema ano mapa aika inyaksü lir. Talisa kecha talenba makai election sadem sadema agitsü asoshi yimjung aser linük

tamendakdak manokshi-i alitsü nungdaker,” ta state meyong MRTV-i parnok indang Telegram channel ajanga metetdaksü.

Myanmar ya 2021 küm February 1 nü nungi mepetmesü tulu nung arudar. Military-i nüburtemi shimba National League for Democracy (NLD) sorkar atsüngtoka nungtugu lenir Aung San Suu Kyi apuba sülen mepetmesü tenzükba liasü.

2020 elections nung NLD-i ochi mashi inyakyim aika benoka inyakogo, ta shia military-i sorkar atsüng, saka parnoki kuli tejangja kecha magütsüteti arudar. 2020 küm election-a NLD puri kanga junga koker liasü.

Sorkar atsüngba sülen military-i küm ka tepeyong atema state of emergency benok aser iba sülen ita trokrok aiben atsülang arudar. Military-i yimjung nung longkak aiterem tashiyim agi azüoktsü merangba aser telungpur telok balala aser coup ajanga poktetba anti-military fighters tem den raraba mapang tang ano emergency ya atsülangogo.

Military indang Commander-in-Chief Min Aung Hlaing, shibai linük Ato Kilonser aser tir ama inyaksangshidar, pai 2023 küm August ita tashi nungbo election agitsü tenangzükba agüja liasü. Ajisüaka linük kübok tesem balala nung sorkar anema nokdakba tali akümba sülen election ya thinena arudar.

2023 küm tatemlen nungi Myanmar military linük anütoktip aser anüolen tesem aika nung tamakok ajangshia arudar, koba United States Institute of Peace-i ashiba agi, military asoshi mimlai aliba mepetmesü ka, kechiyong parnoki linük nung yimden yimsüsüba ya 1960s nungi azüoka arudar.

Mepetmesü liaka temalen aser telunglen nungi nongshiba ajanga tejenobolen makai military-i linük nung election ya 2025 küm tatemlen tashi nungbo ayongzükba agitsü imlar.

Ajisüaka opposition teloktemi election agira tashiyim agi minprongtsü tenangzükba agütsüogo. Parnoki ashiba agi,

election agitsü aliba ya military yimsüsüba ya temzüng ozüng kübok agizükdaksütsü asoshi lir, shirnoki küm pezü tejakdang sorkar atsünga liasü.

Military-i yangluba 2008 constitution kübok, ketdangsurtemi state of emergency aginba sülen ita trok tsungda election agitsüla ta shia lir aser tang benoka aliba emergency ya July 31 nü tembangtsü.

Crisis Group Myanmar adviser Richard Horsey-i Al Jazeera dang ashiba agi, election ya taküm küm tatemlen agitsü imlar aser November nung agitsü akok, kechiyong Myanmar nung yimya agi iba ita election agia arudar.

“National Defence and Security Council senden July 31 nü amentsü lateta lir, mesüra iba masüadang ad hoc senden ka ayongzükba state of emergency benoker aliba tembangba sangdongtsü akok,” ta Horsey-i Al Jazeera dang ashi. “Iba sülen election ayongzükba agitsü atema parnok ket nung ita trok alitsü,” ta paisa shisem.

Horsey-i ashiba agi, state of

emergency tembanga electuion agiba ajanga 2008 military-drafted constitution dangi meyipa sayutsü aser iba jenjang agiba ya Myanmar military züngsemtem aser parnok nem teyari agütsür China-i agizüktsü.

2021 küm February military-i sorkar atsüngba sülen nüburtemi iba anema yimjung nung longkak ait tenzük saka military-i parnoki tashiyim amshia nokdangtsü merangba sülen nisung aika taküm samaogo aser yiruogo.

Kasa mapang nung military-i nübur lenir Aung San Suu Kyi densema lenirtem aser activist tem aika puogo aser karbo taküm tepeyong tepuokdak ayutsü asoshi obendang agütsür lir.

Nüburtemi military sorkar anema nokdakba den küm aika rara aruba telungpurtemia military nem timtem agütsüdar aser parnoki linük kübok tesem aika nung military atsüngtokogo.

Telungpurtem den raraba mapang military-i anüng ajanga yimtsüng balala amakba mapang nüburtem aika tepsetogo aser aika pei talidak ki toktsür jenshiaogo.

Asian Winter Games atema Indian contingent agizükogo

Aenjeti/January 31, 2025 (Agencies): 9buba Asian Winter Games nung India tenüng nungi shilem agitsü atema Sports Ministry-i Indian contingent nung züngsem 88 agizükogo.

Iba asayamung ya China kübok Harbin yimti nung February 7 nungi 14 tashi asayatsü renema lir.

Indian contingent nung asayar 59 aser team officials 29 lir. Parnok ya alpine skiing, cross-country skiing, figure skating, short track speed skating, aser speed skating (long track) amala nung shilem agitsü aser Assistance to National Sports Federations (ANSF) Scheme to athletes kübok sorkari senotsü teyari ajak agütsütsü.

Ajisüaka tebur ice-hockey

contingent nung züngsem 23 aser iba asaya dak sendaka aliba support staff tenetbo no-cost-to-government basis nung temelaba agütsüogo.

Contingent indang chef-de-mission-a 'no cost to government' basis nung temelaba agütsüogo, kechiyong pa Ice Hockey Association of India indang ketdangpur lir, ta ministry indang circular nung shia lir.

"Sorkari züngsem 88 agi kümetba Indian contingent, kong asayar 59 aser team official 29 densema lir parnok nem temelaba agütsüogo," ta ministry-i Hokolbarnü sangdong ka ajanga metetdaksü.

"Tang mezüngbuba Assistance to National Sports Federations (ANSF) Scheme

kübok Alpine Skiing, Cross-Country Skiing, Figure Skating, Short Track Speed Skating, aser Speed Skating (Long Track) nung asayatsü aliba asayatem nem senotsü teyari ajak agütsütsü.

"Tang mezüngbuba India sorkari Asian Winter Games nung linük shilem agitsü atema formally senotsü teyari agütsütsü," ta ministry-i metetdaksü.

Iba ita tetenzüklen Indian Olympic Association (IOA)-i, ministry nungi temelaba agitsü atema asayar 76 tenüng yok saka 41 dang agizüka liasü, kechiyong tanungba yagi individual ranking nung top-six aser team rankings nung top-eight ta qualification standards metongteti liasü.

Mitchell Marsh Champions Trophy masayatetsü



Aenjeti/January 31, 2025 (Agencies): Australia nung asayar Mitchell Marsh teberem yiruba junga taneptsü manguba sülen February ita asayatsü aliba Champions Trophy nung masayatetsü aser Indian Premier League nunga asayatetsü masayatetsü mejangjai kümogo.

Cricket Australia-i sangdong ka ajanga, Marsh Champions Trophy nung masayatsü koba Pakistan aser Dubai na nung February 19 nungi March 9 tashi asayatsü renema lir, ta metetdaksü.

Marsh taruba IPL nunga asayatetsü masayatetsü mejangja, ta osang kar ajanga metetdaksüogo.

"Mitchell Marsh teberem nung tashiba aliba ajanga taruba ICC men's Champion's Trophy nung masayatetsüsa kümogo," ta CA-i ashi. "National Selection Panel aser Australian men's medical team-i Marsh yiruba taneptsü junga mongutetba ajanga iba asayamung atema meshim."

"Pa teberem ashiba tawa tenzükshio go aser iba ajanga NSP-i Marsh atema telemtetba ka agitsüsa aküm," ta CA-isa shisem.

Marsh, shiba all-rounder Aaron Hardie, Glenn Maxwell,

asere Marcus Stoinis nung den Champions Trophy atema shimba asayar 15 rongnung densema liasü, pa national selection panel züngsem kati melentsü, ta CA-i ashi.

"Marsh mapang tatsüka anisüngzüksü aser rehabilitation agitsü. Marsh melener ka shimtsü atema NSP ajurutepa

telemtetba ka agitsü.

"ICC men's Champion's Trophy atema tatembangbuba squad sangdongtsü asoshi tatembangbuba anogoji February 12 nü asütsü," ta CA-isa metetdaksü.

Kasa mapang nung Lucknow Super Giants-i 2025 IPL season atema arishi küm 33 tain March alizükogo. IPL ya March 23 nü tenzüksü.

January ita tetenzüklen tembangba Border-Gavaskar Trophy nung tatembangbuba Test nungbo Marsh melena Beau Webster asayadkja liasü.

India den iba asayamung nung Test asaya pezü nung pai jungabo masayatet. Pai innings tenet nung khen dang run ter dak tema yanglua liasü aser bowling nunga shilem kangabo magi-i liasü.

Afghanistan nung asayar Shapoor asaya nungi anisüngzükler



Aenjeti/January 31, 2025 (Agencies): Afghanistan nung fast bowler tejen Shapoor Zadran-i international cricket career asaya nungi anentsü atema telemtetba agiogo.

Afghanistan tenüng nungi küm ter dak tema asayaba sülen Zadran-i asaya nungi anisüngzüksü telemtetba

agiogo. Pa asaya aliba mapang team international jenjang nung renloka aoba nung pai tongtibang shilem agia liasü.

Afghanistan team international jenjang nung cricket asaya tenzükba mapang left-arm pacer ya kanga tongtibang asayar ka liasü aser pa ICC Men's T20 World Cup

Paulo Fonseca Olympique Lyon head coach kümogo



Aenjeti/January 31, 2025 (Agencies): Lyon-i sangdong ka ajanga, Paulo Fonseca parnok indang head coach inyaksü shimba sangdongogo.

Fonseca-i Pierre Sage melenogo, shiba mapa nungi anentsüogo. Iba French league club ya taoba season mepetmesü nung aliba mapang Sage-i aniteta liasü aser team ya Champions League asayatetsüba jenjang tongnüa aniaka pa mapa nungi anentsüogo.

Ligue 1 nung taoba hopta Nantes den goal 1-1 agütsür tembangba sülen Sage ya Mongolbarnü mapang nungi anenja liasü. Taoba season Lyon pur bonglang nung aliba nungi jenjang trokubaba tonga aniba sülen Sage ya fan temi kanga sakloka aküm.

Club head coach ama Fonseca-i anir Lyon pur mezüngbuba asaya Deobarnü French league nung Marseille den asayatsü, ta club sangdong ka ajanga metetdaksü.

Fonseca lenisüba nung Porto pur 2013 küm Portuguese Supercup akok aser 2016 küm Braga coach asüba mapang pai aniba team-i Portuguese Cup koka liasü.

Fonseca ya Shakhtar

Donetsk indang coach-a liasü aser pa lenisüba nung iba club yagi league-cup asem (2017, 2018, 2019) asre 2017 küm Ukrainian Supercup koka liasü.

December 30 nü AC Milan puri mapa nungi anentsüba sülen Fonseca ya mapa makai liasü.

Tang asaya aliba season nung asaya 19 asayaba sülen Lyon pur league nung trokubaba nung lir aser Champions League asayatsü atema jenjang ka asoshi point pezü dang nüngdaka lir. Parnok Europa League knockout stage atemabo qualify süatokogo.

Ajisüaka Lyon-i ashiba agi, Sage den pilatsü atema telemtetba agiba ya "sporting choice" ka lir, kechiyong pai taküm game shia point ishiba angu aser team tulutem den asayaba mapang timtema arudar.

Fonseca-i team defence tashitaitba küma yanglushia top four Ligue 1 team tem den tali tetoktepa asayatetsü ta Lyon-i amanger.

Club nükjidongji teti Champions League atema qualify asütsü aser Paris Saint-Germain-i league amokbanger asaya aliba jazüksü asütsü asoshi lir.

asem nung asayaogo.

Dunedin nung 2015 ICC Men's Cricket World Cup asayaba mapang Scotland den asayadang pai run ka yanglua par team-i otsüsütsüsa World Cup nung mezüngbuba asaya koka liasü.

Arishi küm 37 tain asayar yagi pa asaya nungi anenba osang ya Facebook ajanga metetdaksü. Pa international jenjang nung tatensa 2020 küm Greater Noida nung Ireland den asaya liasü.

"Iba ango ya ni kodanga majangshinü liasü, saka iba ya asayar ajaki ajangshir. Küm 22 service agütsüba den bendanga agüja asayaba aser cricket kanga meima asayaba sülen ni international cricket asaya nungi

officially anenba sangdonger. Iba ya kü taküm nung telemtetba agiba rongnung tasaktiba ka liasü, kechiyong cricket asaya ya asaya dang nungi taoba kechiasür iba ya kü tejangraba, maitsü aser nükjidong liasü," ta pai zülutsü.

"Tanur asüdang nungi ni Afghanistan tenüng nung asayanüa liasü, aser tang lepa reprangdangra international jenjang nung linük wako atsüketba nung shilem agiba atema kanga nema danga bilemer," ta paisa shisem.

Zadran asaya aliba mapang Afghanistan tenüng nungi 80 ben asayaogo. Pai One Day Internationals nung wicket 43 aser Twenty20 International asaya nung wicket 37 agia liasü.

BILEMDANGANG

"Angati anguba rongsen taolen memeteter."